

tume zugehoret, landen, luten und gutern, varender und leggender habe, besucht und umbesucht. Er ist ouch in nutz und gewer gesaczt wurden mit rechter clage und urteil uff den hochgeboren fursten, hertzogen Erich von Sachsen und von Lowemborg, das ist uff Lowemborg, hus und statt, und uff die herschafft doselbest und uff alle andre sine huszer und stete, wo die gelegen sind odder wie sie namen haben, lande, lute und guter, varende odder legende, besucht und umbesucht; und wir setzen den ergenanten hertzogen von Sachsen mit krafft dis brives in nutz und in gewer der vorgeschrebin des hertzogtumes zu Lunemborg und ouch der herschafft zu Lawenborg und aller yrer herschaffte, eygenscheffte, manscheffte, lande, lute, guter und zugehorunge, besucht und umbesucht. Dovon gebieten wir allen, den dieselbin hertzogtum, herscheffte, huszer, vesten und stete, lande, lute, guter und zugehorunge inne haben, das sie dem obgenanten hertzogen von Sachsen domite wartende sind und yn ouch und nyemand anders halden, nemen und haben vor einen rechten herren, und ym an widderrede hulden und sweren, wann er ez an sie vordert oder ymand von sinen wegen, wer der were; und wer die weren, die des nicht en teten, wann ez an sie wurde gefordert, und sich dowidder setzten in dheyne wis, die weren und teten sere widder des hiligen richs recht, und wir wollen ouch darumb zu yn richten als recht ist. Ym ist ouch vor uns mit gesamenter urtel erteilet, was er und alle sine helffer tund an denselbin erclagten herzogtumen, herschefften, gutern und allen iren zugehorungen, das sie doran nicht freveln widder dhein gerichte noch widder dheinen lantfride in dheine wis, sundern das er sich derselbin hertzogtumen, herschefften, gutern und allen iren zugehorungen mag underwinden und die haben und besitzen und ouch dormite on hindernusse tun und lassen als mit andern sinen eygenlichen gutern. Der zu urkunde gebin wir ym mit urteil dissen brieff versegelt mit des hofgerichtes anhangendem insegel, der gebin ist nach Cristi geburt dryzenhundert und in dem